

# LAI SIANGTHO HOLIM NA

Volum.16

Rev: Suan Khan Thang (Mualpi-Tonzang)

Motto: Matthew: 18:20

mail to: suankthang@gmail.com

Date: 31/ 3/ 2013

**Rome 11: 36, Bang hang hiam cih leh na khem peuh a ma piansak hi a, na-khempeuh a ma hang leh a ma minthanna ding bek in aom a hi hi. Mi khemp-euh in Pasion phat tawntung ta hen. Amen!**

Pasion in Vanpi lei pi ni kha, leh aksi te, Glaxy te nebular te, Planet te a tuam tuam bawlin a ma hun zui in a ma mun san ciat ah ki hei diam daim sak hi. Ei lei tung zong Planet lak ah khat hi aa Pasion in ten theih na ding in a bawl a hi hi. Lei tung dang te ah zong mi hing tawh kibang nuntakna nei pawlkhat omhi. Tua te in mi hingte sangin pilzaw in leitungmi te vanleng tung aa electronic ki zopna te su sia pah pah uh hi. Tua hangin American NASA pawlte in a thubulpi mukhia zolo uh hi.

Pasion vanglet na pen Kam tawh gen zawh hilo hi. A neu mah mah Virus te a kipan electron, Proton, cih te bek thamlo in nalianpi nikha aksi te dong in a ma minthan na ding aa a bawl a hi hi. Tui (1ml) sung ah Germ aki ci lungno tampi tak om aa, nisim aa ih tui dawn lak ah tua te ih ne kha den hi, A hih hangin mipilte Scientist te laupihna sangin Zomi te ih tual niam kawmkal ah hih bang nen nen tawh Pasion in ong si sak lo hi. A neu mah mah lungno te pen Microscope (neu cin lang) tawh ih et ciang bek in kimu zo aa, a neu uh hangin sim mawh tuan huailo hi. Pasion kepna tawh bangmah cilo in, ih ci a dem si se ciat hi. Tua te zong Pasion min thanna ding ve ve ahi hi.

Mi khempeuh Pasion min phat ding aa, Pasion in hong bawl mah bangin Laisiangtho sung ah Pasion min phatden, tang misiangte pawl khat ento ding in: "Mosses" pen Pasion in ama ki muan loh kawmkal ah a nasem dingin na tang kaih hi. Mosses in Pasion tawh ki ho in Pasion min phat den a hih manin Khasiangtho tawh kidimin a mai tang ki en zo lo hi. Tua hangin Israel mite in a et ngamloh na hangin Mosses in a maitang Puankhuh hi. Abraham zong Pasion lawmpa cihna ngah liang hi. Pasion tawh kinai khawlh in kiho in, Pahtawi in Pasion sawl bang bang a suk a to in mang a hih manin a Tapa Isac meihal biakna dingin na piangam hi. Abraham pen kum 90 a zi Sara kum 70 bang a phak uh hangin Pasion sung ah kha muang a, Topa min a phat phat manun a kha bek thamloh a taksa zong no suak gawphi. Tua ahih manin Egypt kumpipa, Gera kumpipa te in Sara pen a zi dingin na la tan tan uh hi. Pasal khempeuh in zong numei hoihno ci in mu mu nuam uh hi. Pasion in ompih hikei leh Abraham pen lawmtan dingpa a hi hi.

Jacob pen a sanggampa Esau kihta in Mesopotamia gam ah apu Laban kiang ah zan tai hi. Eite mahbangin Refugee a suak hi. Tua hunlai in UN te khawng na omnailo ding hi. Kum 14 sung Refugee a hih hangin a pai tung in Pasion kiang ah ki ap a, Topa lungdam sak a hih manin Pasion in Thupha pia in kum 14 pen kum khat bangbek in ngaih sun kha hi. A nuno te tawh ki khawlin nuamsa mah mah aa, a pai khat laitak in a mah guak pangpa mah mah a hih hangin a ciah kik ciangin pii cing in tapa 12 leh tanumei khat nei hi. Tua bang aa lawh cinna pen Topa lungdam sak na pan thupha vive hi.

David in Saul kumpi pa kihta in Shiloh aa, kamsangpa Samuel kiangah ong galtai hi. Tua a galtai na ah ei aa dan in na sepna (factory) khawng ansai khawng, aa nasep hilo in Pasion min phat a lung damko a, lam lam a diang diang lel in tua teng pen nitha aa a neih uh hi. An ne zel lung dam koh zel uh hi. Tua lai ah lokho singpua omlo na pi an ngol tuanlo in a pia pia mah na om hi. Topa thupha a hi hi. Topa lungdam sakin lung da ko ko lel leng a sep dingpen Pasion mawh puak hong hi lel ding hi.

Sual kumpipa in David delh dingin galkap ulian pawlkhat nung delh sak hi. Siloh Samuel kiang ah pha uh a, a phak hangin amau te zong khasiangtho tawh kidim in Pasionmin phat in lam lam mawh uh hi. Kumpi pa kiang ah Report puak ding lam theilo in kuamah ciahlo hi. Tua ciangin kumpipa in keimah vapai in va phialgawp ning ci in ongpai ciangin a mah zong Khasiangtho tawh kidim in Pasion minphat in diangsuk diangto in a puan na ngawn giksa in suah khia mang gawp hi. Tua lai ah Kamsangte bangin pau pau a hih manin (Kiss) tapa kamsang suakngei a hi hiam? ci in paunak in ki zang hi. Bang bang hi ta leh Topa minphat in diang diang in om le cin na vai khempeuh Pasion in ong gual zawh pih ding hi. Na gal te zong kol bulh kullo in Pasion in a lung sim tui suak sak lel ding hi. 1Samuel 19:19-23.

Saultak 16: 16-40 ah Paul leh Silas te Philipi khua ah Jesus min hang in thong a kiat uh ciangin, thum thum tau tau ning ci lo in Pasion min phat in diang gawp uh a Pasion in a ki ko na te uh za in zinliang gawp a hih manin thong kong te ki hongin thong kia teng khempeuh biak inn sung ah lut uh hi. Tua bang teng na lamdang aom ciang in thong ciang pa a mah leh a mah ki that lum dek tak hi. Paul in "lung kham kei in thong kia khat zong tai sim lo hi, Tu ni in Pasion na up leh nang leh na inn kuan pih te in gupna ngah na hi ding uh hi" ci hi. Paul te i lung dam kohna thungetna pahtawina, leh Pasion thugenna te hangin thongcing pa inn kuan un thuum mi te ong suak hi.

Psalm 148, 149, 150, sung ah Pasion phat ding bek bek ong han thawn hi. Pasion pen a phat tak Pasion hi a phat thei hi leng a ma liat ma mah na tawh ki tuak a phat den ding a na hi zaw lai hi.